

Powšitkowne WOZJEWJENJA

njedźelu, 21. nowembra 2021

Wusyłanje Božej mše a młodžinskeho nyšpora

Serbskorěčnu Božu mšu móža wěriwi tutu njedźelu, 21. nowembra, jako livestream w interneće scěhować. Wona přenjesa so w 9 hodź. z Chróšćanskeje cyrkwe. Nyšpor serbskeje dekanatneje młodžiny w 14 hodź. w samsnym Božim domje so tohorunja jako livestream přenjesa. Linkaj na kemše a nyšpor stej pod www.posol.de a na wosa-dnej stronje podatej.

Młodostni na nyšpor z wobrazami wo družkach

Młodžinski nyšpor z wobrazami k temje „Družki“ fotografowki Kerstin Kaczmar z Berlina budže tutu njedźelu Chrysta Krala, 21. nowembra, w Chróšćicach. Započatk je w 14.00 hodź. w cyrkwi. Po tym poskića so na farskim dworje horce napoje.

Zetkanje samostejacych

Samostejacy ze serbskich wosadow su na swoje přichodne zetkanje wutoru, 7. decembra, w 14 hodź. do Smochčanskeho kubłanišća swjateho Bena přeprošeni. Zajimcy njech so prošu hač do wutory, 30. nowembra, w redakciji Katolskeho Posoła přizjewja, telefonowe číslo (0 35 91) 55 02 12. Tež dalši zajimcy su wutrobnje witani. Kóždy njech sej prošu Wosadnik kaž tež nahubnik sobu přinjese. Hygieniske předpisy kubłanskeho domu maja so dodžeržeć. Za zetkanje plaći po tuchwilnych předpisach regula 3G. Štóz chce wotewzaty być, njech to prošu při přizjewjenju zdžěli.

Hłowna zhromadźizna TCM

Předsydstwo Towarstwa Cyrila a Metoda z.t. (TCM) přeprošuje wšitkich člonow towarstwa, člonow sekcijow a korporacijow na swoju hłownu zhromadźiznu srjedu, 1. decembra, do Smochćic. Započnjemy w 19.00 hodź. z Božej mšu w cyrkwi tamnišeho kubłanišća. Přizamknje so zhromadźizna. Do a po hłownej zhromadźiznje změja člonoj skladnosć, swój lětny přinošk we wysokosći pjeć eurow zapłaćić. Aktualne hygieniske postajenja maja so wobkedźbować. Móžno je, zo dyrbi so zhromadźizna pandemije dla krótkodobnje přesunýć. To budže pod www.posol.de wozjewjene.

Adwentne popołdnjo w Drježdžanach

Drježdžanscy Serbja su na adwentne popołdnjo sobotu, 27. nowembra, přeprošeni. Zahaja je w 15.00 hodź. z pobožnosću, kotruž swjeći serbski superintendent Krystof Rummel z Hodźija. Zetkanje wotměje so we wosadnicy wosady swjateho Hubertusa na „Bělym Jelenju“, Am Hochwald 2. Smolerjec kniharnja poskićuje protyki, kalendry a najnowše wudaća zańdženeho lěta. Aktualne položenje pandemije – regula 2G – ma so wobkedźbować.

Adwentny kalender biskopstwa

Na internetowej stronje Drježdžansko-Mišnjanskeho biskopstwa www.bistum-dresden-meissen.de poskićuja lětsa wospjet adwentny kalender. Tutón budže wot přenjeho adwenta, njedźelu, 28. nowembra, hač do hód, sobotu, 25. decembra, přistupny a wopřija wšědnje wobraz z krótkim impulsom k rozmyslowanju.

Adwentnička

Lětuša adwentnička dekanatneje młodžiny budže njedzeli, 5. decembra, w Kulowje. Nyšpor w 14.00 hodź. wobruhi 1. serbska kulturna brigada. Wšo dalše so hišće wozjewi.

Kubłanske dny

W Schmiedebergskim Winfriedowym domje přewjedu so kubłanske dny za młodych dorosćenych wot 18. žiwjenskeho lěta klětu wot pjatka do njedzele, 7. do 9. januara. Dalše za wšitkich zajimcow wot 14. žiwjenskeho lěta wotměja so wot pjatka do njedzele, 23. do 25. septembra.

Adwentne dny za singlow

Na zhromadny adwentny kónc tydženja su wšitcy singlojo wot pjatka do njedzele, 10. do 12. decembra, do Smochčanskeho kubłanišća swjateho Bena přeprošeni. W srjedžišću dnjow pod hesłom „Slědy widžeć – zhromadnje hić“ steja impulsy, čas za sebje kaž tež kreatiwne elementy a časy modlenja w klóštrje Marijinej hwězdze. Nadrobniše informacije nadeńdu zajimcy na stronje www.bildungsgut-schmochtitz.de. Tam kaž tež telefonisce pod (03 59 35) 2 23 17 su přizjewjenja móžne. Za zarjadowanje płáci regula 3G.